

VENDIM
Nr.229, datë 1.4.1996

PËR RRITJEN E PENSIONEVE

Me propozimin e Ministrisë së Punës, Emigracionit, Përkrahjes Sociale dhe ish-të Përndjekurve Politikë, Këshilli i Ministrave

VENDOSI:

1. Pensionet e caktuara sipas ligjit nr.4171, datë 13.9.1966 "Për sigurimet shoqërore shtetërore" dhe ligjit nr.7703, datë 11.5.1993 "Për sigurimet shoqërore në Republikën e Shqipërisë", ndryshohen si vijon:

a) Pensionet e pleqërisë, pensionet e parakohshme, pensionet për merita të veçanta dhe pensionet për vjetërsi shërbimi me masë pensioni mujor:

- deri në 2600 lekë, rriten 25 për qind;

- nga 2601 lekë deri në 2826 lekë, bëhen 3250 lekë;

- mbi 2827 lekë rriten 15 për qind.

b) Pensionet e invaliditetit dhe pensionet familjare rriten në masën 20 për qind.

c) Pensionet e caktuara sipas dekretit nr.758, datë 1.2.1994 "Për një mbrojtje të veçantë të ushtarakut", rriten në masën 20 për qind.

ç) Rritet në masën 15 për qind shtesa mujore e përfutur nga vendimi i Këshillit të Ministrave nr.326, datë 21.6.1993 "Për kriteret e trajtimit të invalidëve të luftës kundër pushtuesve nazifashistë të popullit shqiptar".

2. Përfitojnë rritje pensioni në masën 25 për qind personat, të cilët pensioni u është caktuar sipas ligjit nr.4976, datë 29.6.1972 "Për pensionet e anëtarëve të kooperativave bujqësore", si dhe personat që pensioni u është caktuar sipas nenit 96 të ligjit nr.7703, datë 11.5.1993 "Për sigurimet shoqërore në Republikën e Shqipërisë".

3. Rritjen në masat e caktuara në pikat 1 dhe 2 të këtij vendimi e përfitojnë edhe pensionet që do të caktohen me datë fillimi deri më 31.12.1996, duke përfshirë edhe këtë datë.

- Pensioni i plotë i pleqërisë dhe pensioni i plotë i invaliditetit i llogaritur sipas ligjit nr.4171, datë 13.9.1966 dhe ligjit nr.7703, datë 11.5.1993, me datë fillimi 1.4.1996, nuk mund të caktohet më pak se 3250 lekë në muaj. Masa e pensionit maksimal mbetet 5420 lekë në muaj.

- Pensioni i plotë i pleqërisë dhe pensioni i plotë i invaliditetit, i llogaritur sipas ligjit nr.4976, datë 29.6.1972 dhe nenit 96 të ligjit nr.7703, datë 11.5.1993, me datë fillimi nga 1.4.1996, nuk mund të caktohen më pak se 875 lekë në muaj.

4. Efektet financiare për vitin 1996 nga rritja e pensioneve janë 1 680 milionë lekë dhe përballohen:

- nga fondet e programuara në planin e vitit 1996 të Institutit të Sigurimeve Shoqërore, 1 460 milionë lekë;

- nga fondet rezervë të Këshillit të Ministrave, 220 milionë lekë.

5. Për përballimin e vëllimit të punës për rritjen e pensioneve, Institutit të Sigurimeve Shoqërore i shtohen 6 milionë lekë fond page, që përballohen nga fondi rezervë i Këshillit të Ministrave.

6. Për zbatimin e këtij vendimi dhe për nxjerrjen e udhëzimeve përkatëse, ngarkohet Instituti i Sigurimeve Shoqërore dhe Banka e Kursimeve.

Ky vendim hyn në fuqi menjëherë dhe i shtrin efektet nga 1.4.1996.

KRYETARI I KËSHILLIT TË MINISTRAVE
Aleksandër Meksi